

In'ulteriura FotograVia questa stad

Per la sisavla ga san indigens e hosps da vacanzas guder questa stad la via cun fotografias «FotograVia» en Val Tujetsch. Uonn ein las fotos puspei da veser a Sedrun.

HANS HUONDER/FMR

La cultura e la historia ein omnipresentas en Val Tujetsch. Pliras instituziuns sestentan en favur da quellas. Arranschaments regulars procuran ch'ella vivi, che tradiziuns, usits e la travaglia ed il mintgadi da pli baul restien en memoria. Ina purschida che va en quella direziun ei la «FotograVia». Quella vegn arranschada da TujetschVivaCultura culs organisaturs Forum

cultural Tujetsch, Museum La Truaisch e Cuminonza dallas possessuras e dils possessurs da secundas habitaziuns da Tujetsch.

Per la sisavla ga

La «FotograVia» – la revista cun fotografias da pli baul – vegn purschida questa stad per la sisavla ga. L'entschatta ei vegnida fatga la stad 2018 a Rueras, silsuenter ein suandadas vias cun fotografias a Sedrun, Gonda e Camischo-

las, avon ch'ils organisaturs ein returnai a Rueras. Questa stad tematisescha ella puspei ina via a Sedrun. Sco quei ch'ils organisaturs cun *Tarcisi Hendry* alla testa scrivan, cuntegn la «FotograVia» era uonn 15 tablas ella grondezia A3. Per liung dalla Via dil Bogn vegn mussau fotos veglias. Uonn han ils organisaturs eligiù il tema agricultura tuatschina. Da veser ein fotografias dalla veta e la lavur purila el vitg sco ad alp.

D'in liug a l'auter

Aschia muossa ina tabla per exempel tegias d'alp e la midada d'ina a l'autra. Ei tunscheva buca pli baul da pascular mo en in liug. Per quei motiv veva mintga alp pliras midadas. Quellas midadas fuvan cumbinadas cun bia lavur. Tut il material stueva vegnir transportaus en l'autra tegia. Las tegias da midadas fuvan savens era fetg semplas. Las midadas succedevan damai ch'ins enconuscheva nuot auter. Quei era la pratica dapi decennis. Aunc ils onns 1960 mavan ils da Giuv ora si Liez, da leu si Culmatsch, anavos a Liez e lu giu ella tegia principala ella bucca dalla val. Igl onn 1847 mavan ils da Giuv aunc si Nual ed enta Mut.

L'exposiziun cuoza da miez fenadur entochen ils 19 d'uost 2023. La vernissascha ed avertura dall'exposiziun ei sonda, ils 15 da fenadur 2023 allas 17.00 sper l'ustria Fravia. Sco quei ch'ils organisaturs communiceschian, vegn arranschau pils hosps da lungatg tudest in a guidada sonda, ils 22 da fenadur 2023 allas 10.00.



La tabla numera 10 sefatschenta dalla midada d'ina tegia a l'autra si d'alp.

FOTO MAD